

Ihr liewe Schwestre, liewe Brüder,
verklunge sind die Lobeslieder.
Jetzt kummt die Predischt, das is wohr.
so gehts von do seit 167 Jahr.
Do honn se unser Kerch gebaut. Die Leit vun domols, die han sich das getraut.
die hon devor schun long misse warde.
Die Lutherkerch, die war se klää.
die Reformierde hat im Schutt gelää.
Seit 70 Jahr schon, kaum se glawe.
So viele Johre han die Stennwillerer misse warte.
in dere Zeit is viel passeert.
De Napoleon is durschmaschiert. / deno de Blücher un Konsorte.
De Churferscht, der hat misse gehe
600 Jahr Churpfalz, a die vergehe.
In Wien hat's gehääß, wer will die Palz und jeder ruft, Churferscht behalts.
Donn unser churferscht ging no münche.
net um de himmel weiß und blo se tünche.
nä er hat wolle sin ä känig, dofer war em nix se wenig.
Und was is übrig blib von der Churpalz, das is seit dem die rheinisch Palz.
Ä dääl vom bayerisch känigreich.
Die kerch, die war em net ganz gleich.
Do warn die Pälzer sich ball äinig:
mer hon jetzt norre denne känig.
Dass mer dem kenne widerstehe, wolle mer Prodeschdande zamme in die kerche
gehe.
Da han se wolle äinisch were, im Bäte, Lobe, Gott, den Herre.
Die Union han se ball gegründet. awwer des wäs jo jedes pälzer kind.
Bis awwer unser kerch gebaut war, is gang ins land noch manches Jahr.
De kampf fer Freiheit, schwarz rot gold. die Revolution han se gewollt.
Mer Stennwillerer warn a derbei. Mer merkts bis heit, mir sin so frei.
Endlich hats don doch geklappt. Die Stennwillerer war dann mol uff zack.
die Weltersbacher Miesenbacher, die kottwillerer und schwaner leit, die baute mit zu
dere Zeit.
Jetzt sitzener wo die gesesse. und höörn die predischt unvermesse.
De erschde dääl war die geschicht, wie die kerch do gebaut wor isch.
allä do draus kenne mir was lerne, es steht net immer in der sterne.
Mer lewen do uf dere Erd, und sorsche uns, was do passeert.
Mer plane, schaffe, horte, schlenze. Mer dun ned unser Zeit verschwenze.
Mer rechne aus, was möchlich is, und mache als ä groß geschiss, um unser denke,
due und drachde. doch äns dun mer derbei meischdens missachde.
Der Herr im Himmel guckt uns zu. Geduldig und mit großer Ruh.
Wanns an de Zeit is, awwer dann, do schickt er uns de richtisch mann, un
manschmal is es a ä fra.
ganz gleich, do druff kommts gar net aa.

Do kommen mensche und die wissens gar net selber.
Die schickt de Herr, unser Schutz un Helfer.
der hat gewollt, dass die kerch do steht.
Der Ort an dems von Stennwiller in de Himmel geht.
Die Welt, die bös, han mer verloss, wie die vorderscht dier war ufgeschloss.
die zwett dier, die schließt umgekehrt. – das hääßt fer uns erinspazeert.
Dann gehn mer unner de Orgel dorsch und träte zum Alter ganzforsch.
bevor mer awwer ganz hingehe, bleibe mer andäschtsch stehe, und nemme Platz
und horsche gut. wie uns der Herr, berufe dut.
er halt die Welt in seuner Hand. un er regiirt üwwer alles Land. er wääs, was uns
beschwere dut. er nemmt die Angscht un macht uns Mut.
Dann er is uf die Erd änscht komm, hat offenbart sich in seum Sohn.
damit mer in de Himmel kommen, wo mer ihm halleluja singe sollen.
Das Tor zum Himmel, das is owwe.
Der Jesus Christus, der halts offe.
Der hat de weg ganz frei gemach. De Dod die Sünd, alles Ungemach, das hat er
überwunn un ausgeraamt.
Wer uff ne hört, der werds em glaawe.
desweee du mer do ach daafe.
un feiern als des Abendmahl, als wärn mer schon im Himmelssaal.
Wann mer dann singe uff der Erd, dann werd das drowwe im Himmel geheert.
Die Engel singe mit uns mit.
Ihr leit, das is ä ächter hit.
das heilig, heilig, heilig er, du Gott und Schöpfer, großer Herr.
Du willsch, dass mer im läwe glaawe, dofer dusch du uns dem Dod abkaafe.
Mer sollen immer bei dir bleiwe, un uns mit Freud, die Zeit vertreiwe.
Mer sollen uns freie, un danze un singe, mit lieve und friede, des läwe zubringe.
Du gäbscht uns des läwe, du gäbscht uns die kraft.
ohne deine Wille krieer mer nix geschafft.
Drum lowe mer a heit deine heilische Name.
und san jetzt mitnanner ganz laut
Amen.